

天尊所治者 畢竟不復生 天尊甘露樂
以施於眾生 眾生既服已 不生亦不死
天尊今為我 演說大智慧 眾生聞秘藏
即得不生滅 身心俱安穩 了見海空城
海空智藏說是偈已重白道言天尊今者所

說一切世間不知不覺見真人悉能知見覺
者若使真人是世間者不得說言世間不知
不知不覺如是真人能知見覺若非世間有
何異相復次善男子言真人者亦是世間亦
非世間汝言真人有異何者汝且消息我當
為汝當更演說且持須臾別說其意非是今
日究竟窮言能盡其意即告於汝當一分
別甚深道本汝當解悟等一因緣
於是海空智藏及諸眾會各禮一拜奉辭而
退

太上一乘海空智藏經卷之七

太上一乘海空智藏經卷之八

供獻品

月八

爾時天尊住大寶城為諸眾生演說法要時
有長者居在城西善信供養其字名曰善種
大王與其同類三十三人俱為世間立大橋

梁捨身棄財從座而起稽首作禮長跪瞻仰
悲感流淚頭面著地白天尊言唯願天尊及
諸道士哀受我等貧窮供養為度无量諸天
眾生大哀天尊我等今者无主无親无救无
護无歸无趣貧窮饑困欲於天尊求將來食
唯願哀受我等微供令諸一切若人非人受
我供獻即得安樂然後天尊送神无為當還
寂滅不動之地我今供養猶如諸園勤力農
作得大耕牛良田平正无諸丘墟惡蕪荒穢
荆棘毒草於是良田唯希天雨大哀天尊是
我身者亦復如是唯希一乘甘露法雨雨我
身由我今貧窮希於天尊大慈悲父唯願哀
愍除斷我等貧窮困苦拯及无量苦惱眾生
我今供養唯願大慈平等一切若人非人悉
得充足及諸天仙一切大眾得大利益安穩

常樂爾時

天尊以大慈心發種種智告善種言善哉善
哉善男子大王長者我今為汝斷除貧窮饑
渴困乏之想大慈法雨雨汝身得生法牙
汝於我所欲求壽命身心安樂才辯无量我
當施汝壽命安樂悉達无礙何以故善種長
者具淨供養平等一切如是之施果報无差
何等為平元有差別一者受已住一乘藏二
者受已當還反神寂滅之地我今受汝殷勤
供養令汝具足一乘海空秘密寶藏

爾時善種長者大王即前長跪稽首白言如
尊所說平等果報无差別想是我等輩發自
思惟是義不然何以故若有眾生前受施者
煩惱未盡未成就一切種智亦未能令眾生
具足一乘寶藏次受施者煩惱普盡已得成
就一乘海空秘密寶藏能令眾生普得具足
平等一乘常樂清淨前受施者是不淨貪煩
惱之身是生死身是无常身是餓鬼身次受
施者是智慧身是金剛身真身法身常樂之
身如是差別云何而言平等一乘果報无差

如今哀專前受施者受已食之入腹消化常命增色常恒安樂才辯无量次受施者不淨雜食无諸上果云何而言果報无差爾時天尊告善種言長者大王善男子如我食者已於无量无边劫來无有食身生死之身煩惱之身貪毒之身我身之身常身汝身金剛之身於諸衆生後當受者未見我身是煩惱身是貪雜身是生死身是餓鬼身於是四衆若人非人同我受食食竟平等此食消已即見我相住一乘藏是故我言果報无差若衆生破壞世法普除四魔得入一乘海空寶藏以是之故我言果報无有差別若有善人雖不廣說一切經典於今已了一乘海空秘密寶藏廣爲衆生分別演說功德无量是故我言果報无別善男子如我身者已於无量无边劫來不受諸世間雜食雜形雜相爲衆生故說言受供如彼上真所奉瓔珞然後乃得還寂滅地我今亦爾受汝供獻然後當還一乘海空秘密法地亦復如是我今受供實不受供我今受身實不受身我今讚歎實不讚

歎我今演說實不演說我今普爲此會大衆是故受汝平等供獻實亦不受爾時四衆得聞天尊說如是言普爲我等哀受長者善種大王貧窮供養於是四衆頂禮於地歡喜踴躍同聲讚言善哉善哉大哀天尊憐愍我故爲受供養希有希有善哉善哉種種汝立字名不虛也言善種者名解妙義汝今建立如是善法三界種流是故依實從善立名汝名善種汝今現在得大利益功德願充具足甚深善種大王汝今生在入天中天希有希有善哉善種不可思議我今現世隨大哀尊徧遊餘處亦復甚難值遇信法是善因緣信心供養能辦甘果此事復難於是大衆一心頂禮稽首長跪謂善種言汝今智慧猶如圓月无諸雲翳國土衆生无不瞻仰汝亦如是我等四輩之所瞻仰亦復如是大哀天尊已受供獻今汝得大具足功德一乘海空秘密寶藏是故說汝如月圓光國土衆生或大或小或老或少无不瞻仰汝雖

受身是金剛身是金剛心善種大王汝是三寶智慧種子弘護法流爾時四衆歡喜踴躍而說偈曰善哉善種王 爲世之慈父 雖生人道中以起三界有 我及一切衆 今故稽首讚三界大哀尊 今當還本住 種應愍我等唯願速請住 久留於世間 利益於衆生演說智藏城 徧灑甘露雨爾時善種長者大王得聞說已歡喜踴躍善哉善哉我今聞說猶如有人父母病死忽然得活平復如本我今歡喜亦復如是我今聞說猶如貧人遇一金瓶我今歡喜亦復如是猶如弱喪失於本鄉徃復他國父母離別恩愛久遠於後忽遇善見本鄉父母兄弟甚大歡喜我今歡喜亦復如是於是善種從座而起即說偈曰善哉獲大利 普益於人身 斷除三毒惡永離於三塗 遇得大法利 悉護金剛身值遇元始尊 不懼墮畜生 如海空寶城難見亦難聞 見已種善根 永離餓鬼身

得入登四民 同受慈光明 希有復希有
 應世大哀尊 身心圓智故 度脫人非人
 希有復希有 應世大哀尊 出身如蓮花
 微妙功德相 善斷有病子 永度於死日
 生世值遇難 為人遇亦難 猶如大海水
 漂墮反更難 我今奉供獻 願得无上果
 一切煩惱結 摧破无堅固 我今於此國
 不求天中天 方便獲大利 心亦不懷憐
 哀尊愛我獻 踴躍永无量 猶如大師子
 出處天寶林 我身如師子 哀尊愛我獻
 出處天寶林 是故我歡喜 心如蓮中蓮
 清淨微妙花 諸天童子等 共來侍供我
 國土世間人 悉生大苦惱 已知大哀尊
 即當還本住 不死不生界 絕世之慈父
 玄聲同唱言 世間无慈父 衆生莫恃怙
 孤露失依止 拭淚禮請住 唯願大哀尊
 久住於世間 普為諸道士 演說无上法
 如彼七寶城 安住於海中 善智能善斷
 我等明无闇 猶如大明光 普照琉璃珠
 以此善妙光 普除一切惱 永各並消融

大哀大慈尊 云何還本位 我等諸衆生
 戀慕增悲憫 瞻仰哀淚雨 漂漂成水流
 唯願大慈尊 久住令我信 為斷煩惱惑
 善說法橋梁
 爾時天尊聞說偈已即告善種長者大王善
 哉善哉善男子如是如是如汝所說我今出
 世甚難甚難何以故海空藏城難見難入值
 者生信亦復甚難我今當還反彼无為汝能
 橋梁施食衆生具足功德微妙之相亦復甚
 難汝今善種莫大慈煎安心歡喜深自慶幸
 得大法利汝今供獻成就功德具足一乘臨
 空寶藏不應請我久住世間汝今當知三清
 境界念念无常諸法性相亦復如是因兩從
 影向有今无云何汝等請我住世我觀於我
 於我亦空以我空故於他亦空以他空故是
 名空空於是天尊發大慈心說偈歎曰
 諸法世間生 生者皆歸化 壽命如虛空
 必當有終盡 感衰皆有期 合會有別離
 少壯不停住 念念速運來 命為死所因
 四魔四病惱 常无常宜存 親不親亦離

衆苦轉无際 流轉无休息 三界皆无常
 諸有悉非住 有道亦空无 一切並皆空
 可懷法流轉 常有憂惱患 恐怖諸罪惡
 老疾死衰惱 是諸煩惱中 亦懷怨所侵
 煩惱所侵縛 猶如繫處繭 何有智慧者
 而當樂是處 此身苦所集 是法皆不淨
 諸欲皆无常 故我不貪著 離欲善思惟
 而證海空藏 畢竟明清淨 了了永无殃
 我乘海空船 必度於彼岸
 爾時長者善種大王聞說偈已即起作禮曰
 天尊言如是誠如所說我今愚訥智慧淺薄
 猶如盲城何能思於一乘寶藏深奧之義我
 今已與諸天上聖真仙童子天龍大王以為
 眷屬同離煩惱俱得出家雖未具足一乘空
 戒即墮仙位我亦如是未具大智即入王位
 大哀天尊威神力故通達无礙是大聖數是
 故我今請大哀天尊久住於世勿令反神運
 手无為是我等輩猶如渴人終无變吐甘露
 之味唯願天尊安住為說亦復如是常住於
 世吐於甘露一乘法味並令我等聞所未聞

見所未見成就海空秘密寶藏

爾時眾中有一真人名曰法喜告善種言善哉善種長者大王汝今不應發如是言求請天尊常住於世何以故汝今當知諸行无常空无我相空无住相性相空空觀於三界三

世皆空汝等當知欲求住世當知是學

於是善種含笑問言法喜智士汝言哀專諸行无常空无我相性相空空觀於三界三世皆空汝等當知云何大哀天尊天上世間最尊最勝如是之相豈非有耶若是有者是生滅耶非生滅耶若是生滅如泡電光速有速无去來流轉猶如車輪當知諸行亦復如是我聞天尊壽命長遠安樂自在常住清淨是夫中天是仙中仙云何而言大哀天尊壽命更促不滿百年如彼明王得自在勢以自在故能制他人是富人者後當貧賤人所棄薄為他驅使所以者何失勢力故大哀天尊亦復如是同於諸行則不得稱為天中天為仙中仙何以故是諸行者即是生滅是生死故法喜智士勿觀哀專同於諸有而言无常又

復問言法喜智士為知天尊發如是言不知天尊而發是言大哀天尊同於諸有有則不壞云何反神若使天尊同諸有者則不得言大哀天尊是天中天是仙中仙譬如下方三界法王有大兵士力能戰敵外國怨敵是戰敵時兵士眾中忽有一人力能當千是故外國无不迴伏以是之故稱此大王力能當千如是力士大王愛念賜諸寶祿封位當償自然之食常樂安心无畏之處以是之故得稱當千是人未必力敵於千但以種種作彼巧妙方便所能勝千力故稱當千今大哀天尊亦復如是善能滅除一切眾生是煩惱魔天魔是生死魔以是之故大哀天尊是天中天是三界尊如彼力士一人當千以是因緣成就具足種種无量真實功德一乘海空秘密寶藏法喜智士汝今不應憶想分別大哀天尊同於諸有猶如大富國王長者生得一子時善相師共來占視有短壽相父母聞已知其不任紹繼家嗣不復加愛視如草芥若知壽者不復得為十方王土一切眾生之所

宗重若使天尊同諸行者亦復不為一切世間三界眾生之所崇奉所說法相不變不異真實微妙究竟之法法喜智士若有眾生一心受持守護此法不絕心習日夜存念譬如窮女无有父母本住之處被護之者忽遇病苦饑渴所逼遊行乞食隨他屋宅寄生一子是住家主驅逐令去爾時窮女携抱兒子欲至他國於時路中遇惡風雨寒苦備經抱兒而度其水深潭漂流急疾而不捨於是母子一時俱沒如是女人得慈功德即生上方安樂之處法喜智士若有一人善男善女受持一乘海空寶藏慎令守護勿復說言同於諸行不同諸行唯當自責我今愚癡未有慧眼得見哀尊一乘正法不可思議是故不應宣傳演說大哀天尊果是有為果是无為若有一人得正見心則應說言大哀天尊定是正果常樂无為何以故能為眾生善法故生愛念故譬如女人在惡風雨為愛念子而捨身命一時沒死令我等輩亦復如是寧捨身命不說哀尊同於有為常當想念大哀天

專同於无為得證一乘海空寶藏如彼女人
 得生上方安樂之處何以故以愛子故我今
 愛法亦復如是云何愛法所謂說言大哀天
 尊同於无為不求安樂不求解脫不求常住
 不求反神但以安樂解脫常住自在自來如
 彼女人不求上方安樂之處上天自來我今
 哀尊亦復如是法喜真人如人速遊於路疲
 困寄止他舍卧寐之中於其舍宅忽然大火
 四方起然即時驚悟尋自思惟我於今者定
 死不疑生慙愧心以衣纏身於是命終託生
 上方即於其方滿八十年及生仙王滿百千
 年生於人中化為輪王是人不得生三惡場
 轉輪常生安樂之處以是因緣有慙愧者當
 得不應觀大哀尊同於諸行法喜真人小乘
 外道邪見之師說大哀天尊同於世間有為
 煩惱今真士不應如是於大哀天尊生煩惱
 我想若有外道諸邪見師即以妄語種種惡
 言當知是人死入地獄萬劫幽繫長淪三塗
 五苦之中法喜真人當知哀尊是真實相不
 應今日捨身反神亡於諸子是故我等瞻仰

涕泣推願安住為我演說一乘海空秘密智
 藏善令我等捨於无知求正真果於是法喜
 同聲讚言善哉善種汝今已得安樂之處善
 知哀尊是常是樂不變不異證无為法汝今
 復能善供之食請作有為世間說法作有之
 相如彼大人慙愧想以衣纏身隨火而死
 以善心故託生上方安樂之處清淨國土復
 下化生轉輪聖王常離惡趣住海空城汝亦
 如是善護哀尊請住供設我等下仙利益甚
 深不久當得一乘法藏爾時
 天尊復告善種長者大王善男子汝今善能
 分別法相與我无異汝可隨時速施供食是
 我眾中或有飛仙諸天上聖真人童子地仙
 道士若男若女隨我遊行徧履地上神心疲
 極所須之物汝等應當以清淨物隨時結與
 如是施者即是具足一乘海空平等之城
 又告善種長者大王若有平等一心施者或
 貴或賤若多若少若不足宜得及時我今
 即當反神還乎无為之理安住不動寂滅之
 地

爾時善種及此眾中聞說語已各各歛手仰
 天長叫悲鳴哀號舉手彈指聲徧十方
 爾時諸天諸地一切林木山河丘谷若人非
 人或禽或獸各共哀鳴悲泣淚流不能已矣
 於是眾中有一仙人從座而起稽首作禮拭
 淚稽首白天尊言云何一旦棄捨本誓世間
 孤露莫知所止而是最後國中大王善種供
 養云何反神還乎无為天尊往昔苦勤數年
 隨劫輪轉一死一生一成一敗尚復支持妙
 鏝之味作平等施若人非人一時飽滿況於
 今日善種供獻而云反神復謂善種汝今實
 謂大慈天尊受此供獻定是受耶受非受耶
 定是身耶為非身耶我今思惟大慈天尊受
 此食者定非受食受此身者定非受身如是
 之身是身非身是食非食云何汝等各共涕
 泣哀之无已爾時
 天尊告仙人言如是如是如汝所說是身非
 身是食非食共止哀慟我今當還實无所還
 汝已善知一乘海空微妙寶藏无有无无无
 愛念想常以平等大慈之念念於眾生如母

念子隨方有處應當受持一乘海空自得顯了我身之身悉无有身猶如大海水性光明映照水底得見魚鼈蛟龍水物如是大海水性无魚以水見魚我今无身以我見身亦復如是

天尊以大慈故即放光明從口中出種種光明其光照曜四座衆中過此无已即知是事謂善種言大哀天尊以慈悲故現是瑞相種種光明希有希有如是之事必當不久反神无為設供獻供養一切若人非人以此當知大哀天尊放大光明照乎三塗地獄衆生普及无處悉開光已悲感默然同共啼泣稽首叩頭爾時

天尊復告善種長者大王善男子汝所來施我及四衆若人非人今正是時我今正爾當還反神无為之理過去身形非子所見非子得求爾時長者善種大王聞是說已舉聲號哭哽咽哀歎苦哉苦哉我今孤露三界皆空於是不辭爾時

天尊含笑而言即答海空善哉男子汝能立大三界舟航為諸天人一切衆生无極世界苦惱衆生蠢動之類作大橋梁度諸衆生入海空城安慰衆生死形之地又告海空汝可思惟一乘海空秘密寶藏為他演說往於十方无極世界如是諸國不可思議精進踴躍海空智藏一切衆生鈍根難悟不知一切若人非人皆歸於空空无我相以无我相妄生分別

於是海空即便起立更復自言大哀天尊云何一切是諸衆生皆當空盡既是空盡云何有於罪福苦樂於是天尊答海空言善男子汝等當知一切衆生皆當歸空以歸空故妄造衆罪於罪不空是名罪苦於福不空是名福樂心染罪福有苦有樂有憎有愛以是因緣故有罪福若有一人觀於我身我身既空諸法亦空罪相云何在何方所若在煩惱煩惱相空若在於福福相亦空以是當知罪空福空罪福空故故名空空善男子汝能善化順彼應身故名海空

使諸衆生精思勤念讀誦一乘海空寶藏一字一句一行一偈專心存念當知是人是天中天恒值海空一乘空義恒坐海空一乘空城善男子若有衆生知我无形自然同根當知是人從天上來得仙道滿一切國人各共

歸依善言讚歎名曰長樂不動之國復生海空智藏言善男子若有衆生生於下方住煩惱城知身是苦發心告諸人民我等衆生同住煩惱惡毒火城云何得出離生死城於彼雲中亦如臺上見諸衆生令得悟解復歎善種汝今復能思惟法相如幻如化以方便力无所染著何以故法性清淨以清淨故无我无憂善男子我今受汝平等供獻欲令汝等一切衆生脫生死難諸有煩惱令住一乘不動之地常受安樂微妙具足作世良田

爾時長者善種大王得聞說已頂禮白言善哉哀尊我若堪住為福田時則能了知一切諸法我等今者及諸四衆猶如螻蛄實不能量常理云何以為是世福田我等眷屬憂愁泣哭圍繞燒香一心恭敬謹奉大獻供食之

具唯願天尊慈悲我等於是四眾而說偈言

我等稽首无上師 四眾四緣共勸請

一切上真諸童子 永絕有無常救護

得見一乘大寶城 我等諸子沒苦中

心情悲戀懷憂惱 猶如犢子失慈母

貧窮無法无救護 亦如病子病心人

无醫无藥隨心惱 所食所求悉尅應

雖服世間小乘醫 諸見諸疑莫能了

願請大慈大哀專 為我為緣橫演說

我今无主國无君 四土眾生皆饑饉

我等四眾亦如是 天尊付囑反神身

善寂常住不生死 我等孤露猶衰子

失法失專如枯涸 我等啼哭定當死

唯願不捨大慈心 普濟一乘智藏城

爾時海空得聞偈已即起白言大哀天尊譬

喻言辭猶如國王生育諸子形貌端正心弘

愛念教道經典悉令通達然後大王分付別

國統乘教化我今亦爾猶如王子蒙大哀天

尊教誨具足當還反神我等稽首大哀天尊

唯願莫捨二道眾生若大哀天尊久住於世

說甘露藏充滿一切如是眾生不生畏懼墮

於地獄譬如有人初作術學為官所收禁於

獄中徒伴問言汝受何事來入此獄此人答

言我大憂惱若其得脫計當安樂得大法力

大哀天尊亦復如是為諸眾生住於苦城示

未免苦隨眾生意權應現身大哀天尊教示

存心正念若有所疑恣汝問決我空不空我

常不常我苦不苦我依不依我住不住我去

不去我歸不歸忽有忽无非常非非常非樂

非非樂非斷非非斷非真非非真非非誠非非

誠如是種種法中无量隨汝所問隨汝所疑

我當隨汝分別說之亦當為汝說平等味吾

善種種猶如藥師善解藥分復以妙藥教授其

子諸餘外學受業之人悉不得見今我天尊

亦復如是獨以甚深微妙寶藏教授善種我

今云何不見願聽平等妙法應无秘怪如彼

藥師獨授其子不授外學當知大師情有勝

負法寶秘惜大慈之心終无勝負何以故我

剛身是故遇我不應空過善男子我於往昔

過去劫時種種勤苦今得如是无上道果方

便之號為汝等故權應捨身當還反神无為

一乘海空法城具足種種功德珍寶隨汝所

取是故汝能莊嚴正法解了空義汝能一心

種種積聚包含若海具足功德智慧心藏以

大慈故指示於我一乘寶藏以是之故得曉

空有平等之相爾時

天尊告海空言汝等勿作如凡夫心說有勝

負汝等當以各共止愁勿復憂惱當勤精進

了法藏成就法身亦復如是爾時

天尊告諸地仙勿以下心而生足想汝今學者雖得出家於此大乘不生貪慕諸地仙等汝今四眾身雖得服大慈悲衣黃褐玄中心猶未染一乘法藏四眾地仙雖行柔弱經履名山心未曾求大乘法藏雖得出家未為正法雖服五莖諸結未除我今大慈為海空藏演說一乘真實教勸汝等四眾我今現在於大眾中和合要決一乘法性真實不倒以是之故汝等四眾應當攝心勇猛精進推諸結惱得法明淨

爾時地仙聞大哀天尊說是甚深深有愧想生大憂苦身毛寒豎涕泣交流頭面稽首作禮尊足長跪白言大哀天尊快說无上空无我相止海空愁猶如眾獸象王為上大哀天尊亦復如是十方國土於諸天中最高第一若有眾生大精進能除一切三結煩惱三界无明如田農夫於秋月時勤耕深地能除穢草我等四眾若有一人生大精進亦復如是雖三界難常无常若以是之故大哀天尊雖常无常及神為最猶如國王知命欲終息

赦天下囚繫幽繫悉令得脫然後捨命大哀天尊亦復如是教諸我等一切眾生令得悟解一乘海空亦復如是於是四眾得法利益便大精進俱起作禮奉辭而退爾時

天尊遊於城南時與諸天真童子无鞅數眾俱共集會七寶玄臺爾時復有十方上聖无極神王三十二天大王小王各有五億五萬五千五百五十人俱同會法所一時作禮瞻仰天尊依位而坐爾時

天尊在於城中七寶玄座演說一乘海空寶藏爾時城中諸天妙樂箏篥管籥哀婉妙好音聲奇雅同時俱作散花燒香漂漂流流馨薰无量内外皆發自然道意天尊爾時即便思惟身心不動放大光明普徧十方无極世界地獄之中餓鬼眾生无不覩見於是四眾若人非人一切眾生同在一座各得利益一切根性染著先相心自覺悟發大精進一心諦聽

未有今日大哀天尊放大光明徧於十方无不普周天上天下一切眾生若人非人各得利益未審天尊云何頓爾奇特之相利益一切爾時

天尊發大慈心答海空智藏言善哉善哉善男子各還本坐當為子等分別解說善男子往昔過去吾以大慈演說一乘秘密寶藏廣為天人開張法教普度一切得受真道敬慎三品履於十方五億諸天開校大有化度眾生前劫後劫隨方化度觀空相空都无所著稟空定相都无所相以是因緣我今當還无形之地自然同根海空智藏汝可及時請論要義我觀衆生住煩惱城深著惡相各自愁煎故為哀愍出身應現非煩惱身非五濁身汝等當知一乘海空觀於衆生分別說法於是天尊欲宣此義而說偈言

海空不思議 无形自然應 一切諸眾生 各從烟燭起 不失生因緣 因緣各有對 歷劫苦綿綿 難離亦難免 著相難解脫 隨劫如輪環 我於寶城舍 思惟說一乘

衆生不同故 慈心發哀憐 海空城難入
 故重說妙言 了見諸道士 自然得道真
 集見諸道士 勤學入空城 道士脩仙道
 一生非復生 仙道集且長 无礙亦无間
 緬緬大神王 遊樂於太玄 我今當過去
 寂滅无礙身 衆苦自有緣 賢者乃知真
 爾時天尊說偈頌已告海空言善男子海空
 智藏汝今久已宿植德本登於上道名稱平
 等猶如大海空納衆流汝今亦爾隨應下方
 為諸衆生五大寶藏不可思議我觀汝心有
 善方術欲念衆生醫治有病善男子當來衆
 生常所憂愁有大身病心病腹痛頭病手病
 隨汝所治吾當及神還乎无為不動之地
 爾時海空聞是說已心自憂愁頂禮著地泣
 淚稽首白天尊言云何一旦遊於世間還乎
 反神寂滅之地唯願天尊發大慈風普示一
 切若人非人普知有養濟拔衆生出煩惱城
 安隱寶藏是諸衆生重見病者一時釋散以
 大法雨雨於一切煩惱衆生開導通有是所
 白衆我等諸子大哀天尊過去身形捨離世

間我等各共勸請天尊於是諸子當各自起
 五體投地和聲請言唯願天尊哀愍我等常
 住世間勿云過去爾時
 天尊告善種言善哉諸子莫大啼泣自散其
 心汝等當知自觀是身如大火身如大風身
 如谷中響如水中影无暫安時如絲經盡无
 可尋續當觀諸行猶如毒食多諸過患於是
 善種即自念言大哀天尊不欲住世且止我
 等勿令啼哭譬喻言辭莫之能疑我當云何
 而不啼哭苦哉苦哉世間虛空唯願天尊哀
 愍諸子久住於世勿令反神爾時
 天尊復告長者善種大王善男子汝今不應
 作如是言請我久住為汝演說一乘海空善
 男子我以大哀愍念汝故留待今時為說思
 微一乘空藏我常无我云何有我何以故一
 切諸法苦空无我亦无我以无我故故名
 我還善種汝等當觀一切諸行雜法无我无
 常不住此身多无過患猶如水泡如炎如化
 以是之故汝等四衆不應啼泣當依次第安
 慰其心勿復驚疑我及大眾

於是長者善種大王頂禮白言如是實如教
 旨諸有无常无我无身方便示現身无所身
 而是我等不得不能不懷憂苦我自思惟念
 憂苦者實无憂苦復生悅想我今啼泣實无
 啼泣復生歡喜爾時
 天尊歡喜讚言善哉善哉善男子汝能知我
 示同衆生方便之力生无所生我无所我汝
 今歡樂憂无所憂得了法相若春登臺觀望
 四方悉共來集送望臺上我今亦爾至得入
 海空一乘法城是長樂國无諸煩惱安隱之
 地爾時衆生聞是語已各共惶懼便發念言
 我等云何生在下土煩惱城中三毒火難云
 何得生往到彼國彼大安樂隔礙海水云何
 而往當到彼國爾時衆中有一人曰我曾見
 彼海中三船大船可載无量數人中船可載
 百千萬人小船可載十萬人以此三船有
 大神力不畏風浪萬檣棹皆新堅固我等
 自往海水船中汎越渚側當到彼岸甚大歡
 樂爾時四衆得聞是語心大歡喜各各莊持
 一千二百四十萬人齊心欲去往到彼岸爾

時復有不去之徒五千萬人各別送詣於海邊同別辭去分別既竟爾時眾中有五萬人即上大船有九萬人復上中船有十萬人復上小船各隨其意上船畢竟舉帆便發風調順流須臾千里爾時海岸不去之徒皆笑嘆曰是等羣愚云何取死入於大海望至彼岸寧滅身命云何可至爾時乘船汎舟而往浮景而行然此海中有大洲嶼於洲嶼中復有國土於是三船同到一國國大豐有自然飲食國中人民皆生善心金銀七寶以為城舍爾時小船各共言曰我所乘船船力微弱不堪復行計我本國出十萬里此國膏粱於我乃足願住此國於是小船便住此國中船大船舉帆復去復經一國其土平正七寶滿國自然衣食无有中天壽得其年便即命過魂升天堂身體不交乘中船人復謂言曰我所乘船船力微弱不堪復進且住此國功德受報於我以足請止此國於是便住乘大船人舉帆而去往到彼岸極大樂國國土人民黃金為地碧玉為塔七寶行樹上生甘果七

寶宮殿壽命長遠與道合德於是受生得道自然爾時

天尊告海空言善男子向所說言三船行人或近或遠卿意云何

於是海空即便答言不審天尊向所說言三

船載力可有大小而於水行復有力之或近

或遠是事不然云何三船一時舉帆行有遠

近不審天尊於意云何爾時天尊答海空言

善男子我說言三船行者是事云何善男子

行有精麤有高有下有遠有近有大有小所

以者何國有遠近有貴有賤有貧有富何以

故是近國者是最惡國下緣眾生得生是國

致於五苦无復種民魂神流曳不反人根所

以眾聖咸發大慈引一為三分導眾生欲令

免苦漸入大乘故示大國中國小國或近或

遠以是因緣行有精麤各有緣對自然受之

於是天尊大悲愍心而說偈曰

我以道眼觀 一切諸善惡 本同大混氣

染著使之然 轉落三塗路 一逝不能還

我植一乘智 慈心發勸懲 分別而說三

隨緣導令遠 歷住海空城 何憂不騰仙

小船脫三塗 中船免八難 大船登雲路

三船隨我恩 大乘遊玉京 身登七寶山

此身大智慧 憂念一切根 一切根不度

我不證正果 心懷沖淡德 彌劫拯禍緣

中船戲雲網 由心普懷閻 小乘宴朱陵

可蒙自憂便 小中无智覺 絕望七寶城

爾時眾中有一仙人名曰妙思從座而起稽

首頌首曰天尊言大哀天尊云何功德行有

輕重有大有小報有多少於意云何可得悟

解因緣不乎爾時

天尊答妙思言善男子夫功德者行有智慧

開諸法門示道一切是諸眾生若人非人思

惟一乘海空寶藏得決定觀空解諸法十方

无量國土世界如視掌中无不觀了善男子

若有眾生專行禮拜思念一乘海空智藏忘

於寢食過中不餐守誠不虧善男子譬如孝

子父母死亡抱棺哀泣踴躍號天動於一國

是人非人各共涕泣於是父母即使起活爾

時諸子等共懼喜踴躍无量我今懼喜亦復

如是有眾生思惟一乘海空智藏為他演說忘於飲食我隨守護不捨本願惟喜无量亦如孝子不失父母亦復如是善男子若有眾心懷陰柔身心忍辱口不為惡六根清淨不與人天一切眾生以為惡城集為惡業二十四譬如慈母長養惠子抱不離膝常以守護不與他人共相鬪爭我今守護身心口意亦復如是善男子若有眾人發大布施居家財產園城妻子恩愛親族七寶名珍皆以施人散惠十方一切眾生若人非人譬如甘雨雨潤一切是諸草木无不蒙益我今慈施亦復如是

爾時妙思及諸四眾聞是語已得大法利便各精進俱起共行到天尊前一心作禮奉辭而退

太上一乘海空智藏經卷之八

太上一乘海空智藏經卷之九

捨受品

爾時天尊告善種王善男子大王長者汝捨智財從遠方來請我演說一乘海空智慧寶藏安住國土七寶城中真士之座善男子汝等大王得聞真士海空智藏問病云何於是善種大王長者聞大哀天尊說此語已從座而起頂禮尊足白天尊言彼方真士智慧甚深難為酬對達法相才辯无礙一切仙士悉解一乘海空智藏无不得入智慧之門又能降伏外道眾魔顯現神通其力方便皆已得度智慧難思奇特微妙希有希有大哀天尊為眾生故教導真士住寶城中演說一乘海空智藏當爾之時諸弟子等天下人民大王長者俱發善心捨身智財屋宅僮僕悉皆施散令彼真士演說法時座中信士八千餘真士七百仙士三百大王億千人若男若女悉皆隨從聞聽一乘海空法要作大橋梁作法梯磴於時真士與諸弟子即以神力七寶城中左右宮殿悉皆空虛爾時真士

坐於空城除諸所有唯有寶牀以疾而息是諸弟子若人非人各共圍繞瞻仰涕泣雨淚百行同聲歎言大哀真士捨我等輩孤露莫止苦哉真士捨我等故託疾而息我今思惟大師疾者疾從何來可治療不若可醫治是我弟子寧捨身命療治大師今得為我成就一乘海空智藏安慰我等住大寶城彼說我聽當爾之時海空智藏即唱說言今我疾者隨眾生故是不疾相而為之疾是不見相而為之見是不空相而為之空是不說相而為之說我等眾中心疑未了於是云何唯願大哀為我等故分別說之爾時天尊以大慈心答善種王善男子大王長者如汝所說海空真士了此疾相更无法疾了此住相更无法住了此空相更无法空了此說相更无法說了此安相更无法安了此去相更无法去所以者何疾无所從住无所安空无有著若有法者視之不見若空法者隨之則有以是之故住者无所置去者无所至今所疾者更无可疾今所住者更无可住今

1 01 A D 27